



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Dili

31 Jullu 2015

Tribunál Distritál Dili kondena sidadaun Indonezia nain rua ho pena prizaun tinan 16 no tinan 13 fulan 6 relasiona ho krime droga

Iha 28 Jullu 2015, Tribunál Distritál Dili kondena arguida SY ho pena prizaun tinan 16 no arguida NY ho pena prizaun tinan 13 fulan 6 tanba provadu komete krime droga. Arguida sira hetan kapturasaun hosi Polísia Investigasaun Kriminál Timor Leste, iha Otel Kolmera Dili, iha 13 Dezembru 2014 tanbá kaer toman rai subar shabu-shabu liu kilograma 1 iha pasta laran. Tribunál konsidera katak faktus hotu-hotu ne'ebé prezenta hosi ministériu públiku provadu.

“Desizaun ne'e aleinde adekuada ba ita nia kontestu atu kombat krime organizadu hirak ne'e, desizaun ne'e mós iha sentidu seluk atu haruka mensajen ba estranjeiru sira katak, Timor-Leste mós la'os fatin ne'ebé seguru ba sira atu utiliza nu'udar ponte ba movimentu hodi halo tranzaksaun krime droga ba nasaun seluk,”dehan Diretór Ezekutivu JSMP, Luis Oliveira Sampaio.

JSMP konsidera katak Timor Leste komesa tama iha fatin risku ba movimentu atividade krime organizadu no transnasiona sira ne'ebé agora dadaun buras iha mundu no nasaun sira iha Azia Pasífiku inklui Timor-Leste. Rede ba krime organizadu sira ne'e aproveita nasaun ne'e nia frazilidade nu'udar oportunidade bo'ot hodi halo movimentu ba sira nia atividade ilegal hirak ne'e.

Ministériu Públiku akuza katak iha 13 Dezembru 2014, iha Otel Kolmera, Polísia Investigasaun Kriminál Timor Leste, halo buska iha arguida nain rua nia kuartu no konsege hetan sabu-sabu (metamfetamina) kilo 1 resin, iha pasta metan ida nia laran.

Ministériu Públiku halo ona izame teste ba sabu-sabu ne'e no konsidera sabu-sabu ne'ebé arguida sira lori tama iha kategoria ho klase ne'ebé nia risku metamfetamina aas liu. Ministériu Públiku deskobre katak arguida SY foin fila hosi Bangkok no tuir planu mai Timor-Leste hanesan fatin tranzitu atu liu ba Jakarta, Indonezia.

Ministériu Públiku akuza arguida nain rua kontra artigu 81 (1) letra (a) no (2) letra (a) Lei Indonezia, Númeru: 22/1997 kona-ba Lei Anti Narkotika.

Kazu ne'e prezide hosi Juis koletivu, Dra. Ana Paula Fonseca, Dra. Julmira Auxiliadora no Dra. Maria Solana. Ministériu Públiku representa hosi Dr. Reinato Bere Nahak no arguida nain rua hetan defeza hosi Dr. Estaque Guterres no Dr. Francisco Guterres nu'udar defensor estajiáriu hosi Defensoria Públiku.

Atu hetan tan informasaun, favór ida kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org